

---

**ODBOJKAŠKI SAVEZ  
FEDERACIJE BOSNE I HERCEGOVINE**

---

**P R A V I L N I K**  
o takmičenju OS FBiH

Tuzla, 12.06.2024. godine

Na osnovu člana 50. Statuta Odbojkaškog saveza FBiH, Upravni odbor Odbojkaškog saveza FBiH na sjednici održanoj 12.06.2024. godine usvojilo je:

## **P R A V I L N I K** **o takmičenju Odbojkaškog saveza FBiH**

### **I - OPŠTE ODREDBE**

#### **član 1.**

Pravilnik propisuje osnovne odredbe o organizaciji i rukovođenju stalnim odbojkaškim takmičenjima Odbojkaškog saveza FBiH (u daljem tekstu: Saveza) svih kategorija.

#### **član 2.**

Pravilnik je obavezan za sve članove Saveza.  
Svi ostali dokumenti koji se odnose na sistem ili uslove takmičenja moraju biti u skladu sa odredbama ovog Pravilnika.

#### **član 3.**

Odbojkaška takmičenja mogu biti stalna i povremena.  
Stalna takmičenja su ona koja se organizuju u okviru utvrđenog sistema takmičenja.  
Povremena takmičenja su ona koja se organizuju povremeno, povodom određenih praznika, manifestacija, jubileja i slično.

#### **član 4.**

Učesnici u takmičenjima koja organizuje Savez obavezni su da se pridržavaju opštih i posebnih pravila propisanih zakonima, međunarodnih odbojkaških pravila i odredaba ovog Pravilnika.

#### **član 5.**

Učešće u odbojkaškim takmičenjima obavlja se amaterski, a može da bude i profesionalno ako je propisano važećim zakonom.

#### **član 6.**

U takmičenjima Saveza zabranjeno je korištenje nedozvoljenih stimulativnih sredstava, nasilnog i nedoličnog ponašanja igrača, gledalaca i ostalih učesnika u takmičenju.

### **II - SISTEM I PROPOZICIJE STALNIH TAKMIČENJA**

#### **član 7.**

Upravni odbor Saveza utvrđuje jedinstven sistem i okvirne odredbe stalnih takmičenja u organizaciji Saveza.

### **član 8.**

Sistem takmičenja najvišeg stepena utvrđuje Upravni odbor Saveza, a organizuje Takmičarska komisija.

### **član 9.**

Sistem takmičenja kao pojam podrazumijeva:

- stepen i vrstu takmičenja,
- broj ekipa-učesnika,
- vrijeme sprovođenja u dijelovima i cjelini,
- način sticanja i način gubljenja prava učestvovanja u takmičenju,
- način utvrđivanja i registrovanja plasmana,
- vrstu objekta i igrališta na kojem se igra (otvoreni, hala i sl.).

### **član 10.**

Odluku o utvrđivanju sistema takmičenja i njegovoj izmjeni donosi Upravni odbor OSFBiH Saveza držeći se rokova i postupaka određenih u ovom Pravilniku.

### **član 11.**

Za stalna takmičenja obavezne su propozicije takmičenja koje donosi Upravni odbor, najmanje dva mjeseca prije početka takmičenja.

Propozicijama se utvrđuju svi uslovi takmičenja, uključujući i način bodovanja.

U sistemu se sprovodi jedan od slijedećih načina takmičenja:

- ligaški sa jednostrukim, dvostrukim, trostrukim ili četverostrukim bodovanjem,
- turnirski po grupama i više stepena (kombinacija bodovnog i kup sistema),
- kup jednostruki ili dvostruki sistem bodovanja,
- ligaški dvostruki sa završnim doigravanjem (play-off, play-out, kvalifikacije),
- liga mladih FBiH.

### **član 12.**

Stalna takmičenja u Savezu su:

- prvenstvo za dječake i djevojčice,
- prvenstvo za kadete i kadetkinje,
- prvenstvo za juniore i juniorke,
- prvenstvo za seniore i seniorke,
- odbojkaški Kup Bosne i Hercegovine,
- liga mladih FBiH.

### **član 13.**

Prvenstva za seniore i seniorke organizuju se u više rangova takmičenja, a svaki rang, prema potrebi, može biti podijeljen u grupe. Uslovi i način takmičenja, kao i način bodovanja utvrđuje se Propozicijama takmičenja OS FBiH.

Najviši rang takmičenja prvenstva za seniore i seniorke je Superliga Federacije BiH za muškarce/žene, zatim Prva liga Federacije BiH za muškarce/žene, Druga liga Federacije BiH za muškarce/žene, liga mladih FBiH za muškarce/žene i tako redom u zavisnosti od broja klubova učesnika u takmičenju.

Takmičenje u mlađim kategorijama i Kupu organizuju se u skladu sa Propozicijama ovih takmičenja.

#### **član 14.**

Kao dio jedinstvenog takmičenja, organizuju se prvenstva u svim kategorijama i KUP na prostoru FBiH i BiH.

#### **član 15.**

Takmičarska godina počinje 1. jula, a završava se 30. juna naredne godine.

### **III - KALENDAR TAKMIČENJA**

#### **član 16.**

Upravni odbor Saveza najkasnije do kraja augusta svake godine za sljedeću takmičarsku sezonu utvrđuje okvirni kalendar takmičenja i posebnih priredbi. Na osnovu ovog kalendara članovi Saveza donose svoje kalendare takmičenja.

Kalendar nižeg stepena takmičenja mora biti u skladu sa kalendarom višeg stepena takmičenja.

#### **član 17.**

Kalendar takmičenja se može izmijeniti samo u opravdanim slučajevima.

Odluku o tome donosi Upravni odbor OS FBiH.

Odluka nižeg stepena ne može da mijenja kalendar takmičenja višeg stepena.

#### **član 18.**

Svim oblicima stalnog takmičenja rukovodi Takmičarska komisija, a sprovodi Direktor takmičenja.

#### **član 19.**

Sva stalna takmičenja sprovodi Savez preko svog takmičarskog organa.

Sjedište organa koji sprovode takmičenje OS FBiH je u Tuzli.

#### **član 20.**

Direktora takmičenja imenuje Upravni odbor OS FBiH.

Nadležnosti Direktora takmičenja su:

- registracija utakmica,
- Izdaje račune Klubovima za koje isti izvrše svoje finansijske obaveze prema savezu a u skladu sa aktima saveza,

- donosi odluke o žalbama u prvom stepenu,
- prikuplja dokaze o izvršenim disciplinskim prestupima učesnika takmičenja i podnosi prijave disciplinskom organu,
- odobrava izmjenu termina odigravanja utakmica,
- izdaje nedjeljna saopštenja i biltene sa rezultatima, plasmanom, odlukama i informacijama za koje su učesnici u takmičenju zainteresovani,
- odlučuje o terminima ligaških utakmica učesnika međunarodnog takmičenja,
- obavlja delegiranje delegata ili delegata-kontrolora,
- odlučuje o suspenzijama terena, klubova, igrača, trenera, sudija, delegata i delegata-kontrolora i ostalih učesnika u takmičenju,
- izriče mandate kazne u skladu sa Propozicijama,
- rješava sva pitanja iz takmičarske problematike koja nisu regulisana aktima Saveza, a po nalogu Predsjednika saveza i Upravnog odbora.

#### **član 21.**

Takmičarsku komisiju imenuje Upravni odbor OS FBiH.

Komisija broji 3 člana. Sastanak Takmičarske komisije zakazuje se po potrebama i na zahtjev Upravnog odbora OS FBiH.

Takmičarska komisija ili Direktor takmičenja organizuju izvlačenje parova za Prvenstvena i Kup takmičenja.

Komisija ima zadatak da organizuje i prati takmičenje. Komisija odlučuje o pitanjima u sistemu takmičenja i o žalbama kao drugostepeni organ u okviru svoje nadležnosti. Komisija odlučuje nadpolovičnom većinom .

### **IV - RASPORED UTAKMICA**

#### **član 22.**

Utvrđivanje rasporeda u skladu sa kalendarom takmičenja i donošenje potrebnih odluka u vezi sa sprovođenjem takmičenja vrši se na zajedničkom sastanku ovlaštenih predstavnika u tom takmičenju.

#### **član 23.**

Raspored utakmica stalnih takmičenja mora biti objavljen najkasnije mjesec dana prije početka takmičenja, ukoliko za pojedina stalna takmičenja nije drugačije predviđeno propozicijama za to takmičenje.

#### **član 24.**

Utvrđeni raspored prvenstvenih i kup utakmica može se izmijeniti samo na osnovu unaprijed utvrđenih kriterijuma koji su predviđenim propozicijama takmičenja, s time da pomijeranje određene utakmice ili određenog kola takmičenja ne može biti na štetu drugih zainteresovanih klubova, niti može davati takmičarsku prednost klubovima čija se utakmica odlaže na štetu ostalih učesnika takmičenja.

### **član 25.**

Ako ekipa daje jednog ili više igrača za reprezentaciju radi odigravanja utakmice predviđene kalendarom takmičenja, onda se na zahtjev ekipe i nadležnog organa mora izmijeniti raspored odigravanja prvenstvene ili kup utakmice.

Odluku o odlaganju utakmice iz prethodnog stava, Direktor takmičenja mora donijeti i o njoj obavijestiti zainteresovane klubove pismeno, najkasnije osam dana prije rasporedom utvrđene utakmice ekipe iz koje dolaze igrači za reprezentaciju čiji se termin pomijera.

## **V - VRIJEME POČETKA UTAKMICE**

### **član 26.**

Vrijeme početka utakmice određuje tehnički organizator u skladu sa propozicijama takmičenja.

Ukoliko postoji sporazum ekipa o vremenu početka utakmice stalnog takmičenja, Direktor takmičenja će po pravilu potvrditi taj sporazum, ukoliko ne ide na štetu drugih ekipa.

## **VI –PRAVILA IGRE, BODOVANJE I ODREĐIVANJE PLASMANA**

### **član 27.**

Utakmice stalnog takmičenja igraju se na osnovu zvaničnih pravila odbojke Međunarodne odbojkaške federacije (FIVB).

### **član 28.**

U takmičenju po bod sistemu za svaku dobijenu utakmicu sa 3-0 i 3-1 ekipa dobija tri boda, za utakmicu dobijenu sa 3-2 pobjednik dobija dva boda, a poraženi jedan bod.

Ekipa koja izgubi utakmicu rezultatom 3-0 i 3-1 ne dobija bodove. Ovo bodovanje primjenjuje se u svim takmičenjima na području FBiH.

### **član 29.**

U slučaju da na prvenstvu pojedine ekipe osvoje isti broj bodova, plasman odlučuje prvo broj pobjeda, zatim bolji količnik u setovima, a ako je ovaj količnik jednak, onda bolji količnik u poenima.

## **VII - DELEGATI I RUKOVODSTVA TAKMIČENJA**

### **član 30.**

Za sve utakmice stalnih takmičenja organi koji sprovode takmičenja mogu odrediti delegata čije se dužnosti regulišu posebnim upustvom.

Delegat prije početka utakmice utvrđuje da li se na terenu ili u dvorani nalaze predviđeni organi, sudije, redari i dežurni ljekar.

Ukoliko na utakmici nema delegata, njegove dužnosti i obaveze preuzima prvi sudija.

### **član 31.**

Prije utakmice delegat je dužan da pregleda takmičarske legitimacije i ne dozvoli nastup igračima koji nemaju pravo. Svaka legitimacija mora biti potpisana od strane igrača-ce, trenera-ce i svih ostalih koji su registrovani u savezu. Ukoliko igrač nastupi a nije potpisao ličnu legitimaciju Delegat i Klub će biti sankcionisani do 3.000 KM+PDV. Direktor izriče kaznu i ona je konačna. Svaki trener, igrač-ica, kao i ostala zvanična lica koja se upisuju u zapisnik moraju da posjeduju ovjerenu takmičarsku legitimaciju.

Za nastupe u seniorskim ligama sva zvanična lica moraju imati ovjerenu licencu za tekuću takmičarsku sezonu.

Igrači/-ce registrovani za nastupe u mlađim kategorijama ne mogu nastupiti u seniorskim takmičenjima bez ovjerene licence u takmičarskoj legitimaciji.

Ako delegat ustanovi da neki igrač nema legitimaciju i licencu, može mu se dozvoliti nastupanje pod uslovom da mu utvrdi identitet putem lične karte ili pasoša i uzme pismenu izjavu trenera ili predstavnika ekipe, a klub je dužan da u roku od 48 sati dostavi njegovu takmičarsku legitimaciju nadležnom organu koji sprovodi takmičenje, na uvid. Ukoliko Klub ne dostavi na uvid Takmičarski dokument na roku od 48 sati, bez obzira da li u savezu postoji zvanični dokument Klub će biti kažnjen do 500 KM +pdv, Kaznu izriče Direktor Takmičenja.

### **član 32.**

Prije utakmice delegat je dužan da pregleda i trenerske legitimacije i ne dozvoli trenerima da vode ekipe ako nisu licencirani kod nadležnog organa.

Ukoliko se dogodi da trener nema da priloži svoju legitimaciju, postupak je isti kao i za igrača.

### **član 33.**

Delegat pregleda sve potrebne uređaje i instalacije na terenu da bi utvrdio da li odgovaraju Pravilima igre i odredbama ovog Pravilnika i Propozicija takmičenja.

Ukoliko organizator nije izvršio sve tehničke pripreme, delegat će odrediti vrijeme od 15 minuta da se sve dovede u red. Ako ni poslije ovog vremena utakmica ne može da počne, delegat donosi odluku o neodigravanju utakmice i obavezno podnosi izvještaj nadležnom organu. Isto tako, delegat će zahtjevati od organizatora da osposobi teren za igru i poslije elementarnih i drugih nepogoda.

#### **član 34.**

Delegat i prvi sudija na prvenstvenoj utakmici ovlašteni su da odluče o odstranjenju pojedinaca, dijela ili sve publike ako onemogućava normalan tok utakmice.

Prvi sudija u dogovoru sa delegatom prekida utakmicu u nenormalnim uslovima igranja.

Smatrat će se da je usljed ponašanja publike onemogućen normalan tok utakmice ako se čine nepristojni i nepropisani ispadi prema igračima ili sudijama, ako se na teren bacaju predmeti, ako sudije, delegat i igrači budu fizički napadnuti i zbog drugih okolnosti koje otežavaju normalan tok utakmice. Ukoliko je ikako moguće, službene osobe trebaju u najkraćem mogućem roku ponovo osigurati uslove za nastavak odigravanja utakmice. Delegat-kontrolor dužan je u ovakvim slučajevima podnijeti dodatni izvještaj Direktorima takmičenja.

#### **član 35.**

Poslije završene utakmice delegat je dužan da sastavi izvještaj.

#### **član 36.**

Ukoliko se klub žali na utakmicu, delegat je dužan da odmah prikupi potreban materijal za rješavanje žalbe, odnosno pismene izjave svih zvaničnih lica (cijelog sudijskog kolegija) o navodima i obrazloženju žalbe, koja je unijeta u zapisnik. Delegat posebno daje pismenu izjavu i svoje mišljenje o žalbi.

Ukoliko se utakmica snima uz najavu jednog od klubova, Delegat – kontrolor je obavezan to evidentirati u svom izvještaju. Snimak utakmice uzima se kao dokazni materijal u slučaju ako je jedna od ekipa najavila žalbu. Klub-učesnik koji želi snimati utakmicu dužan je to da najavi tri dana prije utakmice (u pismenoj formi) domaćinu i takmičarskom organu Saveza. Domaćin je obavezan obezbijediti uslove za snimanje.

#### **član 37.**

Odstranjenog igrača saslušava delegat i njegovu izjavu prosljeđuje nadležnom takmičarskom organu. Izjavu mora da potpiše i odstranjeni igrač.

Sudija koji je odstranio igrača dužan je da sastavi svoj izvještaj o odstranjenju.

#### **član 38.**

Liste delegata i sudaca utvrđuje Upravni odbor OS FBiH najkasnije 30 dana prije početka takmičenja za svaki stepen takmičenja.

### **VIII - SUDIJE**

#### **član 39.**



Sve javne utakmice mogu suditi samo ispitane odbojkaške sudije.

Listu sudija utvrđuje Upravni odbor OS FBiH.

Sudije su obavezne da po utvrđenju liste za narednu takmičarsku sezonu izvrše testiranje znanja kod Komisije za sudijska pitanja i ukoliko pokažu nedovoljno poznavanje međunarodnih pravila odbojkaške igre, ne mogu suditi u tom rangu u toj takmičarskoj sezoni, dok ponovo ne pristupe polaganju i dok ne polože ispit.

#### **član 40.**

Komisija za sudijska pitanja broji 3 člana. Komisija odluke donosi nadpolovičnom većinom prisutnih.

#### **član 41.**

Sudije su obavezne da na teren izađu u sudijskoj opremi 30 minuta prije zakazanog početka utakmice i da se jave delegatu i predstavnicima ekipa.

Ukoliko na utakmicu dođe samo jedan od delegiranih sudija, utakmicu će suditi taj sudija i sudija sa odgovarajućom kvalifikacijom koji se u tom trenutku zatekao u sportskoj dvorani, što se konstatuje u zapisniku i potpisuje od strane oba kapitena prije početka utakmice. Ukoliko na utakmici se pojavi samo jedan sudac a u dvorani nema odgovarajuće osobe iz prethodnog stava onda sudija koji je došao na utakmicu preuzima ulogu prvog sudca i sudi utakmicu uz saglasnost oba trenera i kapitena.

U tom slučaju taksa sudiji se povećava za iznos koji sudac nije došao ,određen u Odluci o nadoknadi službenim licima za tekuću takmičarsku sezonu. Što znači da sudcu koji sudi utakmicu pripadaju dvije takse.

#### **član 42.**

Svim sudijama pripada naknada za prevoz i dnevnice za službeno putovanje za odlazak na utakmicu i taksa za suđenje u skladu sa propozicijama takmičenja i Odlukama UO OS FBiH.

### **IX - ZAPISNIK I PROTOKOL O ODIGRAVANJU UTAKMICA**

#### **član 43.**

Na svim javnim utakmicama se vodi propisani međunarodni zapisnik.

Delegat je dužan da u roku od 48 sata po odigranoj utakmici dostavi nadležnom takmičarskom organu originalni primjerak zapisnika sa protokolom-izvještajem sa utakmice. Ukoliko Delegat ili Prvi sudac-gdje nema delegata, ne dostavi zapisnik u određenom roku biće sankcionisan od 50-200 KM.

### **X - IGRALIŠTA I OCJENE SPOSOBNOSTI TERENA ZA IGRU**

#### **član 44.**

Svaka dvorana u kojoj se odigravaju utakmice mora ispunjavati uslove predviđene Pravilnikom o tehničkim normativima za odigravanje odbojkaških utakmica u sportskim dvoranama.

#### **član 45.**

Odredbe o organizaciji i redu na utakmicama u dvoranama donose nadležni organi koji rukovode takmičenjem i one moraju jasno utvrđivati mjere za osiguranje bezbjednosti svih učesnika odbojkaške utakmice.

#### **član 46.**

Utakmice se mogu igrati samo u dvorani koja odgovara pravilima igre.

Domaći klub je obavezan da dvoranu pripremi za igru tako da bude potpuno sposobna za odigravane utakmice.

Da li je teren sposoban za igru u slučaju više sile, odlučuje delegat i prvi sudija.

Delegat i prvi sudija obavezni su da u zapisnik unesu donijetu odluku o nesposobnosti terena i da zapisnik dostave takmičarskom organu u roku od 24 sata uz prethodno telefonsko i telefaks obavještenje.

Nije dopuštena žalba poslije utakmice na neispunjenje uslova vezanih za tehničku organizaciju utakmice.

### **XI - PRAVO NASTUPA IGRAČA NA UTAKMICAMA**

#### **član 47.**

Pravo učešća na prvenstvenim i Kup utakmicama imaju samo igrači koji su uredno registrovani i licencirani.

#### **član 48.**

Izdavanje registracija i licenci za igrače-ce, trenere-ce, doktore-ce, fizioterapeute federalnih liga i Premijer lige vrši Registraciona komisija OS FBiH. Između sastanaka sve licence i registracije izdaje Direktor takmičenja ili osoba ovlaštena od Upravnog odbora OSFBiH uz obavezan izvještaj Registracionoj komisiji. Registraciona komisija broji 3 člana, koje imenuje Upravni odbor OSF BiH. Registraciona komisija se sastaje po potrebi i na zahtjev Upravnog odbora. Registraciona komisija je odgovorna ukoliko izda neku od licenci za takmičenje u tekućoj sezoni a neispunjava uslove po Pravilniku o registraciji.

Izuzetno za igrače koji su promijenili klub u posebnom prelaznom roku, kao i za strane državljanke koji se prvi put registruju, može se izvršiti dopunsko licenciranje koje objavljuje u Dopunskom spisku licenciranih igrača po završetku posebnog prelaznog roka.

U toku takmičenja dopunski se mogu licencirati igrači u sljedećim slučajevima:

- igrači mlađih kategorija koji su prije početka takmičenja bili registrovani za taj klub,
- igračicama koje su bile na porodiljskom odsustvu,

- igrači koji su dobili saglasnost za odlazak u inostranstvo, a vrte se u klub iz koga su otišli, do kraja kalendarske godine u kojoj je izdata saglasnost,
- igrači koji su prešli u drugi Klub u redovnom prelaznom roku.
- igrači Kluba koji nemaju važeću legitimaciju a članovi su Kluba.

U takmičenjima mlađih kategorija pravo nastupa imaju igrači i igraciće određenih godišta u skladu sa odlukom UO OSF BiH.

Pojedini igrači mlađih kategorija mogu nastupiti u starijim kategorijama, ali u toku jednog dana, ne mogu nastupiti za dvije kategorije.

U ligama Federacije BiH i KUP BiH mogu nastupati za seniore –ke igrači-ce koji-e navršavaju 13 godina u sezoni za koju se licenciraju. Klub kada podnese zahtjev za registracije i licence trenera, iugrača-ce i ostalih,a koji ispunjavaju uslove, kancelarija saveza je obavezna u roku od 10 dana uraditi iste i poslati Klubu putem pošte a ukoliko ima nekih problema onda se ta registracija i licenca izdaju kada se steknu uslovi za registraciju. Ovo sve zbog provjra .Klubovi su dužni voditi računa o dostavi na vrijeme dokumentacije u Savez u suprotnom sami snose odgovornost.

#### **član 49.**

Igrač može nastupiti na revijalnim i trening utakmicama za neki drugi tim samo uz pismenu saglasnost svoga kluba.

Protiv igrača i kluba koji postupe suprotno ovim odredbama, bit će pokrenut disciplinski postupak prema odredbama Pravilnika o disciplinskoj i materijalnoj odgovornosti.

## **XII -LJEKARSKI PREGLEDI IGRAČA-CA**

#### **član 50.**

Zdravstvena zaštita igrača-ica je obaveza klubova.

Zabranjeno je igrače-ce izlagati sportskim aktivnostima koje mogu da ugroze ili pogoršaju njegovo zdravstveno stanje.

Svaki trener, igrač-ica mora da ima ovjerenu takmičarsku legitimaciju sa ovjerenim ljekarskim pregledom, a za nastupe u seniorskim ligama mora imati i ovjerenu licencu.Na registaciji sa poledine mora biti pečat ustanove i Doktora koji potpisao ljekarsko da je igrač-ca sposoban igrati.Takođe igrači-ce koji igraju u mlađim selekcijama moraju imati na kartonu registracije sa poledine isto pečat ustanove i Doktora koji je ovjerio da je igrač-ca sposobni za nastup

Ljekarski pregled se obavezno obavlja svakih 6 mjeseci, a brigu o važenju i produženju ljekarskih pregleda vodi isključivo Klub.

Poseban ljekarski pregled je obavezan za sve igrače/-ice mlađe od navršenih 16 godina . Klubovi za igrači mlađe od 16 godina dostavljaju dokaz samo kada igrač-ca nastupaju za seniorsku ekipu. Ove potvrde se nedostavljaju u mlađim

selekcijama, koristi se ljebarski iz legitimacije. Potvrda o ljebarskom pregledu ne smije biti starija od 6 mjeseci. Sve ljebarske preglede, uključujući i poseban ljebarski pregled, može dati samo ovlaštena ustanova. Poseban ljebarski pregled se izdaje striktno samo za jednog igrača-ca. Ukoliko Klub prekrši ovo pravilo i igrač-ca nastupe protivno ovom stavu Delegat i Klub će biti sankcionisani do 300 KM +PDV. Kaznu izriče Direktor takmičenja i ona je konačna.

Ljebarski pregled igrača i trenera obavlja se u sportskim ambulantomama, a samo ukoliko one ne postoje, pregled će se obaviti i u drugoj zdravstvenoj ustanovi.

### **član 51.**

Svaki klub je dužan da osigura od posljedica nesretnog slučaja sve igrače/-ice, trenere, kao i ostala lica koja su sastavni dio ekipa koji nastupaju u zvaničnim takmičenjima. Niko nemože dobiti licencu za nastup u tekućoj sezoni bez dostavljenog osiguranja od nezgode. Uz zahtjev za registraciju igrača-ca Klub je dužan dostaviti originalni spisak osiguranih sportista od nezgode u suprotnom nemože izvršiti registraciju istih. Sve aktivnosti u postupku osiguranja, kao i u postupcima za provedbu ugovorenih odredbi u postupku za naknadu su u isključivoj nadležnosti Klubova.

## **XIII – NEDOLAZAK NA UTAKMICU STALNOG TAKMIČENJA**

### **član 52.**

Gostujuća ekipa dužna je da u mjesto takmičenja stigne najkasnije jedan sat prije zakazanog vremena za početak utakmice. U protivnom sve posljedice neodigravanja utakmice zbog kašnjenja snosi ekipa koja je došla kasnije.

### **član 53.**

Objektivnim razlozima za nedolazak na utakmicu smatraju se smetnje izazvane elementarnim nepogodama koje su u skladu sa propisima proglašene od nadležnog organa (nevrijeme, požari, poplave, zemljotresi i sl.) i bolesti u slučaju da nadležni organi proglase epidemiju u određenim područjima što utvrđuje Zdravstvena komisija OS FBiH. U slučaju proglašene epidemije na području gdje se nalazi sjedište Kluba a iz tog Kluba ukoliko je minimalno 5 (pet) igrača-ca bolesno onda se odgađa utakmica. Klub koji traži odgodu utakmice dužan je dostaviti za igrače-ce originalnu dokumentaciju o epidemiji prije na 72 sata od zakazanog termina odigravanja utakmice u savez. Odgođena utakmica mora se najkasnije odigrati u roku od 72 sata od predviđenog termina. (ukoliko se ekipe nedogovore o drugom terminu). Dogovor mora biti potvrđen od Direktora takmičenja i nemože ići na štetu drugih učesnika u takmičenju. Odluka Direktora takmičenja je konačna.

Svi ostali razlozi (odlazak na ekskurzije, školske obaveze i sl.) ne smatraju se objektivnim razlozima.

Klub je dužan registrovati i licencirati dovoljan broj igrača da unatoč razlozima koji se ne smatraju objektivnima može odigrati utakmicu.

Troškove komisije snosi OSFBiH, a ako je Klub zloupotrijebio i obmanuo Savez sa ljekarskim uvjerenjima onda Klub snosi troškove komisije i protiv istog se pokreće disciplinski postupak.

## **XIV - PREKID UTAKMICE**

### **član 54.**

Ako se na stalnim takmičenjima započeta utakmica ne može završiti iz objektivnih razloga, prvi sudija u dogovoru sa delegatom prekida utakmicu i zajedno sa delegatom i kapitenima ekipa u zapisniku konstatuje postignuti rezultat u momentu prekida utakmice.

Kada se utakmica nastavlja na istom terenu poslije jednog ili više prekida u ukupnom trajanju manjem od 4 sata, rezultat prekinutog seta ostaje na snazi, a igra će se nastaviti gdje je prekinuta.

Kada se utakmica nastavlja na drugom terenu ili drugoj dvorani, rezultat prekinutog seta se poništava, a rezultati odigranih setova priznaju se. Utakmica će se nastaviti pod istim uslovima kao u poništenom setu.

Kada su prekidi u ukupnom trajanju duži od 4 sata, utakmica se mora ponoviti u roku od 24 sata bez obzira na postignute rezultate i na kojem će se terenu odigrati.

Pravo nastupa u nastavku utakmice imaju samo igrači koji su uvedeni u zapisnik prije početka prekinute utakmice.

Ako se nastavak utakmice ne može odigrati po odredbi stava 2. ovog člana, kao i ako se utakmica ne može ponoviti (shodno stavu 4.) u roku od 24 časa, Direktor takmičenja će odrediti datum i mjesto odigravanja nove utakmice, vodeći računa da se nova utakmica po pravilu treba odigrati prije početka narednog kola. Na ponovljenoj utakmici mogu igrati samo igrači koji su imali pravo nastupa na dan prvobitno zakazane utakmice. Ako dođe do povrede ovog člana Klub koji je napravio prekršaj snosi odgovornost i biće kažnjen novčanom kaznom od 300-500 KM.

Nastale troškove organizacije utakmice u vezi prekida, nastavak i ponavljanja utakmice snosi klub domaćin-organizator utakmice.

### **član 55.**

Objektivnim razlozima za prekid utakmice i stava 1. prethodnog člana smatraju se smetnje izazvane elementarnim nepogodama (nevrijeme, požari, poplave), uništenje ili oštećenje instalacije u dvorani udarom groma, zatim nestanak električne energije na širem području odigravanja utakmice.

## **XV – NEUČESTVOVANJE PRIJAVLJENIH EKIPA**

### **član 56.**

Neučestovanje prijavljenih ekipa na stalnim takmičenjima, koje su predviđene kalendarom takmičenja, povlači za sobom odgovornost predviđenu Pravilnikom o disciplinskoj i materijalnoj odgovornosti i nadoknadu materijalnih izdataka prouzrokovanih otkazom.

## **XVI – UČEŠĆE EKIP U OSTALIM TAKMIČENJIMA**

### **član 57.**

U masovnom Kup i propagandnim takmičenjima koje organizuju odbojkaške organizacije članovi OSFBiH mogu učestvovati odbojkaške ekipe drugih organizacija za fizičku kulturu, školskih društava za fizičku kulturu, preduzeća i dr. uz pismenu saglasnost Upravnog odbora OSFBiH. Klubovi članovi OSFBiH nemogu igrati nikakve lige ili takmičenja sa Klubovima koji nisu članovi OSFBiH. Ukoliko neki od Klubova članova OSFBiH bude učestvovao u bilo kom takmičenju sa Klubovima koji nisu članovi OSFBiH isti će biti suspendovani i protiv istih će biti pokrenut disciplinski postupak. Upravni odbor će razmotriti mogućnost ako Klubovi finansijski mogu izdržati da organizuju ligaško takmičenje u mlađim kategorijama.

## **XVII – NENASTUPANJE ZBOG SUSPENZIJA I POSLJEDICE**

### **član 58.**

Ukoliko se ekipa nalazi pod suspenzijom, ne može nastupiti a odluku o registraciji utakmice donosi nadležni takmičarski organ po donošenju odluke disciplinskog organa.

Ukoliko disciplinski organ obustavi postupak ili ukine suspenziju ekipi, utakmice koje po rasporedu ta ekipa nije odigrala, smatraju se odloženim i o njihovom odigravanju odlučuje nadležni organ za takmičenje.

### **član 59.**

Na odloženim utakmicama mogu nastupiti samo igrači koji su imali pravo nastupa na dan prvobitnog utvrđenog termina za tu utakmicu. Za igrače-ce koji prijeđu u drugi Klub, a Klub ne izvrši uplatu za Zaštitu prve registracije 10% prema Savezu, igrač-ca će biti suspendovani, a protiv Kluba će se pokrenuti disciplinski postupak i sve utakmice biti registrovane za protivničku ekipu 3:0 u kojima je nastupao suspendovani igrač-ca. Suspenzija važi do izmirenja finansijski obaveza. Odluku o suspenziji donosi Direktor takmičenja i Odluka je konačna.

## **XVIII – RASFORMIRANJE KLUBA I ODSUPANJE OD UTAKMICA**

### **član 60.**

U slučaju da se klub rasformira i odustane od takmičenja, a nije odigrao 50% utakmica, svi rezultati njegovih utakmica se brišu.

Ukoliko je odigrao 50% i više utakmica postignuti rezultati se priznaju, a ostale utakmice protivnici dobijaju bez borbe. Plasman ekipe, koja je odstupila od takmičenja u tekućoj takmičarskoj sezoni, se briše.

Smatrat će se da je Klub odustao od takmičenja ako svojom krivicom nije odigrao dvije utakmice u toku takmičenja i protiv njega će se pokrenuti disciplinski postupak.

Klub koji se prijavi pa odustane od takmičenja, automatski se suspenduje i pokreće se disciplinski postupak.

Klub koji u toku takmičenja napusti takmičenje ili bude isključen iz takmičenja vraća se u niži stepen takmičenja i protiv njega se pokreće disciplinski postupak.

Klub koji istupi iz sistema takmičenja sa seniorskom ekipom, prije početka takmičarske sezone ili za vrijeme takmičenja iz bilo kojih razloga igrači-ce su slobodni bez obzira da li se taj Klub takmiči sa mlađim kategorijama, a njihovi ugovori sa tim Klubom prestaju da važe. Igrači-ce bilo kojeg uzrasta mogu preći u neki drugi Klub u redovnom ili posebnom prelaznom roku bez ikakve naknade prema matičnom Klubu, samo se plaćaju obaveze prema savezu u skladu sa Odlukom o zaštiti registracije a primjenjuje se Pravilnikom o registraciji.

## **XIX - REGISTRACIJA UTAKMICA SA POSTIGNUTIM REZULTATOM**

### **član 61.**

Ako na odigranoj utakmici nije uložena žalba, a ne postoji osnov za registraciju utakmice po službenoj dužnosti 3:0 (parforfe), utakmica se registruje sa postignutim rezultatom.

Organ koji sprovodi takmičenje registruje odigrane utakmice u roku predviđenom propozicijama odnosnog takmičenja.

## **XX - REGISTRACIJA UTAKMICA SA 3:0**

### **član 62.**

Utakmica se registruje u korist protivnika sa 3:0 (25:00, 25:00, 25:00) u slijedećim slučajevima:

- ako ekipa iz neopravdanih razloga nije nastupila,
- ako teren nije sposoban za igru ili nisu ispunjeni uslovi (temperatura, svjetlo i sl.) krivicom domaćina,
- ako ekipa odbije da odigra utakmicu,

- ako ekipa nastupi sa igračem ili trenerom koji nije pravilno registrovan ili nisu imali pravo nastupa po osnovu Pravilnika o takmičenju i Propozicijama takmičenja,
- ako ekipa nastupi sa igračem ili trenerom koji se nalazi pod kaznom ili suspenzijom,
- ako ekipa nastupi na utakmici a nije izvršila sve finansijske obaveze prema savezu, ako dostavi potvrdu o uplati obaveza od banke a nije imala na računu sredstva (prevara) odnosno sredstva nisu u roku prebačena na račun saveza.
- ako ekipa nastupi sa igračem koji je na ljebarskom pregledu proglašen nesposobnim za takmičenje ili ako nema uredan ljebarski pregled,
- ako ekipa nastupi sa igračem koji je toga dana već nastupio u drugoj kategoriji i
- ako ekipa nastupi sa lažnim doktorom .
- ako je ekipa kažnjena zabranom nastupa.
- ako ekipa nastupi nepravilno što se tiče pravila libera.

O drugim slučajevima koji nisu predviđeni ovim članom rješava nadležni organ takmičenja.

### **član 63.**

Protiv ekipe koja učini prekršaj iz prethodnog člana pokreće se disciplinski postupak.

### **član 64.**

Na utakmicu i njen rezultat, primjenu pravila igre i pravilnika, dopuštena je žalba.

Žalba na tok utakmice, ukoliko propozicijama takmičenja nije drukčije predviđeno, mora se najaviti i obrazložiti u zapisniku i protokolu sa odigrane utakmice koji odmah poslije odigrane utakmice dostavljaju u savez, a eventualno dopune obrazloženja i dokaz o uplaćenju taksu, ima se dostaviti preporučenim pismom nadležnom takmičarskom organu u roku od 48 sati od dana odigrane utakmice.

Žalba po drugim osnovama mora biti telefaksom najavljena u roku od dva dana po odigranoj utakmici, a obrazloženje sa taksom, mora se dostaviti u roku od dva dana od odigrane utakmice.

Neblagovremeno najavljena, neobrazložena, netaksirana ili nedovoljno taksirana žalba, neće se uzimati u obzir i odbacuje se kao neuredna.

Klub koji najavi žalbu na utakmici u zapisnik a ne postupi u skladu sa ovim članom (nedostavi žalbu u savez sa svim potrebnim dokumentima), biće novčano kažnjen sa 200 KM+pdv, i istu mora uplatiti prije početka narednog kola, u suprotnom neće moći odigrati utakmicu i ista će biti registrovana službenim rezultatom za protivničku ekipu a protiv ekipe počinioća prekršaja Direktor takmičenja pokrenuće disciplinski postupak.

Bliže odredbe o žalbenom postupku propisuju se propozicijama takmičenja.



#### **član 65.**

Na turnirskim takmičenjima postupak na ulaganje žalbe, odredit će se propozicijama takmičenja.

Žalbe koje se podnose zbog neispravnosti terena ili uređaja, odnosno u vezi sa terenom ili uređajima, ili u vezi temperature vazduha, svjetla ili nastupa igrača, mogu se podnositi samo prije početka utakmice.

#### **član 66.**

Svaka žalba po pravilu mora biti riješena u roku od 8 dana od njenog prijema, ukoliko propozicijama tog takmičenja nije predviđen drugačiji rok.

#### **član 67.**

Žalbe u prvom stepenu rješavaju, za sva takmičenja, organi koji sprovode takmičenja.

#### **član 68.**

Na osnovu podnijete žalbe oštećenog kluba, organ koji sprovodi takmičenje poništiti će utakmicu i odrediti da se igra nova, u slučaju da je prilikom suđenja utakmice došlo do materijalne povrede Pravila igre, koja je imala bitan uticaj na tok i rezultat utakmice, a nije bilo krivice od oštećene ekipe za ovakvu povredu.

Troškovi organizacije nove utakmice snosi organizator takmičenja.

#### **član 69.**

O žalbama iz člana 64. ovog Pravilnika odlučuju organi predviđeni propozicijama takmičenja u prvom stepenu.

#### **član 70.**

Drugostepena odluka mora biti donesena u roku od 8 dana od dana prijema žalbe, ukoliko propozicijama takmičenja nije predviđen drugi rok.

#### **član 71.**

Takse na žalbe se utvrđuju i uplaćuju prema Propozicijama takmičenja, Aneksima propozicija i odlukama UO OS FBiH.

#### **član 72.**

Protiv konačnog rješenja u postupku takmičenja, na prijedlog zainteresovane stranke, može se pokrenuti postupak pred Upravnim odborom Saveza, ako se smatra da su rješenjem povrijeđeni propisi o takmičenju, uz priloženi dokaz o uplati takse za žalbu. Procedura za rješavanje svih žalbi pokreće se onoga momenta kada uplaćena sredstva za taksu budu operativna na računu OS FBiH.

Prijedlog se može podnijeti u roku od mjesec dana od dana dostavljanja konačnog rješenja.

Neblagovremene i nepotpune žalbe neće se uzimati u postupak. Klub koji izgubi 2(dvije)utakmice službenim rezultatom u jednoj takmičarskoj sezoni po automatizmu se seli u niži rang takmičenja,a sve ostale utakmice gubi službenim rezultatom 3:0 ako je odigrao preko 50% utakmica u toj sezoni. Ovaj stav je konačan i na ovaj uslov niko nema pravo žalbe.

## **XXI – ORGANIZACIJA UTAKMICE**

### **član 73.**

Klub-domaćin utakmice dužan je da cjelokupnu organizaciju sprovede prema Pravilima igre, ovom Pravilniku i Propozicijama takmičenja, a gostujuću ekipu, sudije, delegata i takmičarski organ mora obavijestiti o mjestu i vremenu odigravanja utakmice najmanje 5 dana prije zakazanog termina.

### **član 74.**

Klub-domaćin utakmice dužan je da obezbijedi gostujućoj ekipi, sudijama i delegatima smještaj i ishranu ukoliko oni to pismeno zatraže 3 dana ranije.Klub domaćin snosi troškove službenim licima iz stava 1. ovog člana ako su sl.lica udaljena više od 150 km u jednom pravcu od mjesta boravka do mjesta odigravanja utakmice a gostujuće ekipe same sebi snosi troškove.

### **član 75.**

U slučaju da naplaćuje ulaznice klub-domaćin utakmice treba da postavi blagajnu, a mora da organizuje redarsku službu i takmičenje – utakmicu prijavi organima unutrašnjih poslova.

### **član 76.**

Dužnost je kluba-domaćina da preuzme sve mjere kako bi obezbijedio normalni tok utakmice, kao i zaštitu u svakom pogledu za igrače, sudije, delegata, gledaoce i ostale učesnike na utakmici.

Klub-domaćin utakmice određuje svog zvaničnog dežurnog predstavnika za svaku utamicu.

### **član 77.**

Svakoj utakmici mora da prisustvuje doktor medicinske struke sa propisanom medicinskom torbom koja mora sadržavati materijal za pružanje prve pomoći. Ukoliko na utakmici nema doktora sa propisanim uslovima koje ispunjava,utakmica se neće odigrati i biće registrovana službenim rezultatom za gostujuću ekipu a protiv Kluba domaćina biće pokrenut disciplinski postupak.

### **član 78.**

Klub-domaćin utakmice snosi punu odgovornost za sve prekršaje i incidente koji se dogode na samoj utakmici ili neposredno u vezi s njom.

#### **član 79.**

Klub-domaćin je dužan da ima u potpuno ispravnom stanju sve uređaje: igralište, konstrukcije sa mrežom, ručni semafor, sudijsku platformu, knjigu zapisnika, termometar za mjerenje temperature vazduha, manometar za mjerenje pritiska lopte, higijensko-sanitarne uređaje, svlačionice za ekipe i posebno za sudije, tuševе sa toplom vodom. OSFBiH će običi pojedine dvorane i izmjeriti jačinu svjetlosti –luxa i dvorane koje ne ispunjavaju uslove jačine svjetlosti biće im zabranjeno odigravanje utakmica. Gostujuća ekipa nemože tražiti neodigravanje utakmice zbog trenutne slabe svjetlosti.

### **XXIII - FINANSIJSKE ODREDBE**

#### **član 80.**

U cilju što boljeg organizovanja takmičenja, mogu se formirati fondovi.

Finansiranje fondova vrši se iz uplata klubova koji se takmiče u istom stepenu takmičenja.

Sredstva formirana na ovaj način mogu se koristiti jedino za potrebe tih takmičenja, što se reguliše propozicijama za odgovarajuće takmičenje. Klubovi koji ne izvrše u potpunosti svoje finansijske obaveze prema savezu nemogu započeti takmičenje. Direktor takmičenja je obavezan zabraniti takmičenje ovim klubovima i o tome izvjestiti UO OSFBiH. Klubovi nemogu dobiti registracije i ovjerene licence dok ne izvrše svoje finansijske obaveze prema Savezu (dug iz prethodnih sezona i dug iz tekuće sezone). Drugi dio prvenstva takođe Klubovi nemogu početi sa takmičenjem dok ne izvrše uplatu drugog dijela kotizacije odnosno sve nastale finansijske obaveze prema Savezu. Ukoliko neki od Klubova koji imaju finansijske obaveze (dugovanja iz prethodnih sezona) i pokuša izbjeći dug, registracijom novog Kluba, Upravni odbor takav Klub iz istog mjesta neće primiti u članstvo. Osoba ovlaštena za zastupanje i predstavljanje iz Kluba koji je napustio članstvo u savezu zbog dugova, nemože biti angažovana niti u jedan Klub dok ne izmiri obaveze koje je imao prije napuštanja članstva. Klubovi su dužni da zatraže informaciju iz saveza prije angažovanja takve osobe.

### **XXIV – ZAVRŠNE I PRELAZNE ODREDBE**

#### **član 81.**

U pogledu pravnih lijekova i drugih elemenata postupka, primjenjivaće se odredbe Satuta OS FBiH ukoliko ovim Pravilnikom i Pravilnikom o disciplinskoj i materijalnoj odgovornosti to nije regulisano.

**član 82.**

Tumačenje odredaba ovog Pravilnika daje Upravni odbor OS FBiH.

**član 83.**

Pravilnik stupa na snagu danom donošenja.

Stupanjem na snagu ovog Pravilnika stavlja se van snage Pravilnik broj: 1996-06/24 od 06.10.2023. godine.

Broj: 2062-06/24.

Tuzla, 13.06.2024.

P R E D S J E D N I K

---

Dr.sci. Miloš Jelčić